


Inacts 1245
DE RITE

COGNOSCENDIS ET CURANDIS

NUDATIONE, CARIE ET NECROSI
OSSIUM.



OBSERVATIONES

PATHOLOGICO-MEDICAE

AUCTORE

L. WISSMANN,

MEDICINAE ET CHIRURGIAE DOCTOR.

HALAE,

SUMTIBUS AUCTORIS IN BIBLIOPOLIO RENGHERIANO.

CIDIDCCCXX.



V I R O
ILLUSTRI DOCTISSIMO, EXPERIENTISSIMO
AMPLISSIMO
CAROLO HENRICO DZONDI,
MEDICINAE CHIRURGIAE ET PHILOSOPHIAE DOCTORI
MEDIC. ET CHIRURG. PROFESSORI P. O.
FACULTATIS MEDIC. ASSESSORI INSTIT. CLINICI
DIRECTORI
IN ALMA FRIDERICIANA HALENSI ET VITÉBERGENSI
CONSOCIATA

PRAECEPTORI
IN AETERNUM PIE COLENDO,
HASCE
LITERARUM PRIMITIAS
PIA GRATAQUE MENTE

OFFERT

AUCTOR.

Digitized by the Internet Archive
in 2015

<https://archive.org/details/b22389908>

D E

RITE COGNOSCENDA ET CURANDA
NUDATIONE, CARIE ET NECROSI OSSIUM
NOVAE QUAEDAM OBSERVATIONES.

P R A E F A T I O.

Non dubito fore plerosque, qui cum libelli hujus titulum, novas *) quippe de difficilioribus Chirurgiae capitibus carie potissimum et necrosi observationes promittentem, simulque Auctoris nomen, in numero clarorum aut artis peritorum nondum cognitum inspexerint, audaciae, quid? quod arrogantiae eum accusare haud dubitent. Verum mitiora viri docti de animo ejus, et verecundia, qua hasce observationes cum iis communicare, easque judicio eorum tanquam novas examinandas et ponderandas committere ausus est, judicia ferent, cum cognoverint, eas non in privata auctoris praxi, aut suo modo judicio dubio et incerto factas, sed in schola clinica

*) Non omnes sed quasdam modo harum observationum novas esse jam titulus indicat.

nica et sub auspiciis Cel. *Dzondii* praeceptoris f. v. institutas, repetitas et probatas nec non cum ejus venia a hujus libelli auctore publici juris factas esse. Quare cum argumentum ad quod spectant hae observationes, morbos nimirum ossium praecipuos ad gravissima scientiae medicae minusque exulta capita pertinet spero fore ut quae propositurus sum a iudicio virorum artis peritorum non prorsus improbentur, modo nova revera et ab experientia comprobata nec non ea, qua decet verecundia prolata erunt. Quae utrum ita se habeant benevoli judicent lectores.

Erit autem instituti mei ratio haec: primum naturam et medelam Nudationis ossium, deinde Cariei et postremo Necroseos et ita proponam ut symptomatum eorum inter se discrepantiam et similitudinem exponam simulque ostendam, quibus erroribus et praejudiciis circumsepta sit eorum semiotice et medela, et quomodo rectius et naturae convenienter describi possint et debeant. Deinde ad divisionem et enumerationem variarum harum affectionum progrediens, aetiologiam earum exponam; tandem prognosin faciam et postremo justam et efficacem medendi methodum a vulgari paululum alienam proponam; simulque causas et rationes addam cur vulgaris medendi ratio plus noceat quam proficiat.

I.

DE NUDATIONE OSSIUM.

Omnis disputatio a definitione ordiatur, ait Cicero, ordiamur igitur nostram tractationem a definienda notione et natura morborum quos examinandos nobis proposuimus.

Nudatio ossium quid sit ipsa adpellatio indicat, nimirum nihil nisi mera periostei jactura, *s.* ablatio partis ossis cujusdam ita ut os illa parte nuda i. e. sine periosteo sit.

S y m p t o m a t a.

Ad cognoscendam et distinguendam ossium nudationem per se a carie et necrosi non sufficit examinasse partem ossis nudati specillo exploratorio (*Sonde*) et eam a periosteo nudam reperiisse; idem enim in carie etiam et necrosi observatur, quae tamen toto coelo ab illa affectione discrepant. Verum tamen iste error quotidie in vita communi a chirurgis artis minus peritis et in libris chirurgicis a chirurgis magis peritis committitur, etenim quis est qui ignoret, scriptores chirurgicos non paucos in panaritio quartae classis, tum cum periosteum suppuratione currumpitur cariem videre sibi videri? aut in fistula lacrymali e destructione sacci lacrymalis et periostei sub eo per suppurationem cariem suspicari, si specillo os nudatum a perioste-

steo reperiunt? Aut in abscessu rheumatico palati, maxillarum, genarum etc. periosteum occupante et mox suppuratione consumente nonne cariem adesse credunt cum non nisi ossis nudatio adsit.

Neque suppurationis et puris natura et indoles aliquid ad diagnosin conferre potest cum non nisi in partibus mollibus sedem suam habeat; neque causae remotae aut proximae fuerintne dynamicae an mechanicae nosse ad certam nudati ossis diagnosin per se sufficit cum eadem causae necrosin etiam efficere possunt.

Cognoscitur autem, et a carie et necrosi distinguitur ossis nudatio hisce momentis:

1. Periosteum deest in quadam ossis parte et aut
2. Lamina seu superficies exterior ossis integra aut haec quoque demta est, et ossis parenchyma *scilicet* interior structura spongiosa aut solida specillo detegitur v. c. a vulneratione.
3. Suppuratio aut nulla aut bona et sana in partibus adjacentibus mollibus adest.
4. Pars ossis nuda aëris contactu aut prorsus non, aut saltem per brevissimum tempus, ne per sexagesimam quidem horae partem exposita fuit.
5. Injectiones medicae nullae adhuc factae, neque omnino remedia ossis nudati superficiei applicata erant.

6. Per breve modo tempus, per aliquot 3 — usque ad 7 dies nudatio duraverat, sine expositione contactui aëris.

7. Fossula in circuitu *scilicet* peripheria partis a periosteo nudatae et in confiniis integri periostei, nulla adest, *scilicet* quod idem est nulla adsunt signa resorptionis inchoatae partis nudatae ossis.

8. Non adfuit inflammatio interna ossis seu inflammatio parenchymatis ossis — (non periostei solummodo.)

Omnia haec momenta simul adsint, necesse est, si certus esse velis revera neque cariem, neque necrosin sed meram ossis nudationem adesse. Etenim si suppuratio maligna adest, aut os periosteo orbatum aëri diutius expositum; aut medicaminibus irritantibus affectum fuit; aut omnino diutius duravit nudatio: ea ossis pars corrumpitur et emoritur, *scilicet* quod idem est, necrosi corripitur. Quodsi vero fossula in circuitu partis nudatae in ossis superficie reperitur, resorptio partis necroticae *scilicet* emortuae jam incipit. Denique si inflammatio ossis antecessit, caries adesse solet, quae inflammationem sequitur. Ad confirmandam diagnosin accedat necesse est.

A e t i o l o g i a.

Seu causarum occasionalium diligens examen, quae periostei jacturam aut defectum eliecerunt, quarum duae classes sunt

1. *Mechanicae.* Omnes nimirum laesiones et vulnerationes ossium, quibus periosteum prorsus destruitur, aut inflammatur et in suppurationem abit, tum instrumentis acutis tum obtusis v. c. contusiones, potissimum vero pungentibus fiunt. Facilius enim inflammatur periosteum si parvis iisque cylindraceis et cusptide munitis instrumentis vulneratur, quam si majoribus majora vulnera accipit. Huc pertinent etiam vulnerationes quibus particula ossis abscinditur, et fracturae quibus parva pars periostei avellitur.
2. *Dynamicae.* Causae dynamicae, quibus periosteum destruitur, sunt inflammatio et inde orta suppuratio, omniaque momenta quae stimulos inflammatorios efficiunt, inter quae frequentissime observatur rheumatica affectio, quae, uti constat, membranas potissimum fibrosas infestare solet. Causae aliae nunquam aut rarissime meram nudationem efficiunt, sed plerumque necrofin. Duplicis igitur naturae nudationes ossis esse patet, aut traumaticae *scilicet* instrumento, vulneratione factae, aut inflammatoriae, per suppurationem destructo periosteo.

P r o g n o s i s.

Nulla faustior fere prognosis est, quam nudationis ossis, quippe quae nisi perversè curata

rata brevissimo tempore sponte sanari solet. Et mirum profecto est, quantopere in dījudicanda hujus mali natura et prognosi erraverint chirurgi et quotidie errent, cum haud raro tum, cum os non nisi periosteo nudum specillo sentiant, cariem suspicantur et universo illo apparatu, in carie vulgo adhibito, contra simplicem ossis nudationem accingantur.

M e d e l a.

Medela naturae. Natura sola propriis viribus nudationem sanare solet per inflammationem adhaesivam, ita ut vasa partis ossis laesi, simulque vasa partium superjacentium, potissimum cutis, nec non periostei peripheriae partis nudatae materiam illam plasticam secernant cujus ope adhaesio et sanatio per inflammationem sic dictam adhaesivam ∫. per primam intentionem fieri solet.

Medela perversa. Non raro sufficit jam ad curandum morbum perversam medelam vitasse. Idem de nudatione ossis valet. Perversa vero medela tum adhibetur, cum pro carie aut necrosi malum habetur et variis remediis incitantibus deligatur, quae infra indicabuntur cum de carie sermo erit.

Medela artis recta. Ad sanandam nudationem non opus est nisi justa aptaque deligatione, quae ab aëris aditu frigoreque vulnus de-

defendat, omniaque ea sedulo vilet atque arceat, quae ossis superficiem irritare possunt. Nullo ergo remedio; nullo unguento, nulla injectione, frictione aut epithemate opus est, nullo penicillo ꝑ turunda ad conservandam aperturam. E contrario omnia illa sedulo vitanda probeque et attente vulneris aut abscessus orificium deligatione obturandum est, ita tamen ut puri, si adfuerit, liber exitus servetur. Verum rarissime suppuratio continuabit postquam abscessus apertus fuerit. Brevi tempore abscessus et vulnus sanabitur, ad summum quatuor aut septem dierum spatio.

II.

C A R I E S.

DE NOTIONE ET NATURA CARIEI.

Cariei notio ex ipso verbo hauriri nullo modo potest, cum non nisi vetusti et corrupti quid indicet.

Caries vero est effectus inflammationis ossis ipsius, non periostei solum, et respondet suppurationi in partibus mollibus. Quare vulgo pro exulceratione ossis habetur. Et revera non negari potest, cariem esse exulcerationem ossis
cum

cum inflammatione conjunctam et ex ea oriundam; verum sicuti in partibus mollibus, duplicem habemus suppurationem, bonam, qua sanatio partis laesae et cicatrisatio perficitur; et malignam, qua pars affecta magis magisque destruitur: ita quoque in osse duplex illa jure distinguenda est suppuratio. Observamus, enim interdum ossis exulcerationem qua exfoliatio aut sine illa sanatio ossis brevi tempore efficitur; e contrario vero saepius etiam exempla occurrunt suppurationis ossis malignae, quae per plures menses et annos durat ossisque substantiam magis in diem corrumpit, erodit, atque destruit; variisque, non secus ac in partibus mollibus comitatur infaustis symptomatibus affectionibus v. c. pessimo pure *scilicet* ichore excrescentiis spongiosis, fistulis, et necrosi. Caries ergo est secundum stadium inflammationis ossis *scilicet* ossis suppuratio.

Diagnosis. Symptomata.

Symptomata cariei quae vulgo in libris chirurgicis enumerantur, fere omnia incerta et dubia, nonnulla etiam falsa sunt. Subjiciamus ea brevi examini

1. *Defectus periostei seu ossis pars nuda*, aut oculis aut exploratione per specillum reperta certum cariei signum nullo modo esse posse, jam e superioribus patet, etenim meram etiam
ossis

ossis nudationem sine carie et necrosi indicare potest; uti in antecedentibus probatum est. Praeterea etiam in necrosi os a perios-
teo nudatum est.

2. *Aspera tactui superficies ossis*, alterum cariei symptoma vulgo habetur, quo indicari docent laminam ossis externam carie corruptam ossisque substantiam exesam esse, et spongiosas cellulas tactui sese praebere; aut excrescentiis osseis superficiem asperam et inaequalem factam esse. Verum pace auctorum istorum dixerim, signum asperitatis esse incertum. Nam non modo in vulnerationibus ossium, quibus lamina externa ablata est, pars laesa internam spongiosam texturam exhibere et inaequalis ac aspera esse potest; verum etiam in statu normali multae ossium partes asperiores aut inaequali superficie sunt, quare asperitas specillo detecta in vulnere aut abscessu utrumque indicare potest. Hoc peritum quidem fallere non potest verum minus peritos, imprimis propter anomalias formationis. Huc accedit, quod etiam in necrosi, potissimum si resorptionis initium et progressus quidem facti sunt, fossulae et depressiones inaequales et asperae oriuntur, quae diagnosin per calamum exploratorium ob causas modo laudatas incertam, adhuc incertiore reddunt. Quae cum ita sint asperitas

ritas superficiei ossis signum diagnosticum cariei non est.

3. *Specillum exploratorium argenteum* aut emplastrum lythargirii nigro aut fusco colore obductum multis pro certiore signo habetur. Verum non est. Nam neque ex ulceribus cariosis neque necroticis ichor per se colorem nitidumque splendorem specilli exploratorii corrumpit et in nigricantem mutat; sed tum demum cum aut diuturna in ulcere detentione aut causis qualitativis corruptus fuit. Omnis praeterea suppuratio, fuerit pus bonum an malignum, si diutius in abscessu aut ulcere manet, corrumpitur et idem phenomenon in specillo argenteo aut emplastro ostendit. Quare hoc quoque signum cariei per se dubium esse apparet.

4. *Odorem malignum seu potius cariosum* certissimum plures autores cariei signum habent. Nec profecto negandum est, peculiari odore saepe numero suppurationem ossis esse, praesertim cum simul partes molles potissimum nervi suppuratione correpti sunt, v. c. in dentibus cariosis, si ad nervos et vasa usque destructio penetravit. Sed neque hoc certum cariei signum haberi posse intelligitur e frequentibus. Odor ille peculiaris non semper adest, nimirum quando partes molles suppuratione non corripiuntur, aut pus ex illis
or-

ortum antequam os tetigit effluit; cujus phaenomenis plura exempla occurrerunt in instituto clinico Cel. *Dzondii*. Exinde patet odorem puris *ſ.* ichoris e vulneribus cariosis revera non ex osse ipso aut ejus suppuratione sed a contacta puris e partibus mollibus cum osse carioso et ejus pure originem ducere. Praeterea similem odorem pus ex ulceribus malignis, potissimum iis habet, quae in vicinis membranarum fibrosarum locum habent, aut fistulosarum, in quibus pus per longum tempus latet et corrumpitur. Quare pus ex ulcere carioso ab eo quod ex ulcere maligno partium mollium oritur difficillime et saepius prorsus non dignosci potest.

Ex his omnibus patet, primaria cariei signa auctorum pro certis haberi non posse, nam neque singula, neque conjuncta certam cariei diagnosis constituant, ita ut a necrosi rite distinguatur. Quae cum ita sint necesse est, ut alia via ad cognoscendam cariem nos accingamus.

Primum quidem probe tenendum est cariem esse effectum, five secundum stadium inflammationis ossis. Itaque ubicunque caries est, ibi symptomata inflammationis ossis antecessisse necesse est. Nimirum dolor obtusus et profundus, tumescentia ossis lente adaucta, color cutis non mutatus, suppuratio profunda sub periosteo in ipsa

ipsa ossis substantia oriunda, ejusque parenchyma destruens; affectis denique partibus adjacentibus mollibus, periosteoque corrupto per integumenta communia, inflammatione secundaria correpta sensim prorumpens. Sedulo vero cavendum est, ne inflammationem ossis ipsius adesse existimemus, cum non nisi inflammatio periostei adsit. Tum enim, destructo per suppurationem periosteo nudatio modo ossis aut necrosis oriri potest, neutiquam vero caries. Veruntamen haud facilis negotii res est accurata illa utriusque affectionis diagnosi, cum symptomatum magna intercedat similitudo. In panaritio v. c. quartae classis inflammatio et suppuratio in periosteo, non in osse sedem suam habent, illud destruitur, neutiquam os, et plerumque nudationem ossis, interdum si cura perversa accedit, necrosin nunquam vero cariem nisi aliae accedant causae producant; symptomata tamen cum inflammatione ossis ipsius, v. c. ex affectione scrofulosa orta tantam affinitatem habent, ut inter se confundi possint, nisi oculo attento et benigno observentur.

Duo enim solummodo sunt, praeter causas, quibus differunt inflammatio ossis et periostei primigenia: dolor et intumescencia, caetera perinde fere sese habent. Dolor minor est et obtusus, intumescencia superne mollior magisque circumscripta in ostitide, multo major vero et
ad

ad partes vicinas nec raro etiam ad remotiores serpens uterque in periostitide, potissimum, in panaritiis. — Antegressam ergo ossis inflammationem pro primaria cariei symptomata habeo.

Jam si inflammatio ossis revera antecessit et suppuratio secuta est, symptomata quoque: periostei jactura, asperitas et inaequalitas superficiei ossis, odorque peculiaris; per se ambigua et incerta, ad confirmandam diagnosin non parum facere possunt, praesertim si accedunt alia momenta, nimirum causae idoneae, de quibus in sequentibus dicetur — et torus carneus (Wulst) *f.* agger qui aperturam circumdat. Solet enim hoc aggere, singulari sane phaenomeno, quantum quidem experientia attentius consulta affirmare videtur, non nisi eorum ulcerum aperturas circumdare, in quibus caries latet. Propululat autem ista excrescentia fungosa e margine orificii ulceris, ad altitudinem circiter lineae, paremque latitudinem interdum etiam usque ad majus volumen extenditur, annulumque et quasi sphincterem format, in cujus medio minima eaque angustissima apertura, a quarta ad decimam lineae partem reperitur, per quam pus aut ichor exitum suum habere possit. Causa hujus phaenomeni in puris, quod ex osse vel secer nitur, vel ossis contactu mutatur, indole esse videtur, qua margines cutanei orificii ulceris ita afficit et excitat ut haec excrescentia fungosa in forma
valli

valli propullulet. Videtur autem natura prospiciens et in omnibus suis operibus salutares fines prosequens, aërem potissimum infestum orificio sanationis in fundo ulceris eo melius et accuratius arcere, resorptionemque et exfoliationem adjuvare velle. Quare invita natura, et contra ejus aperta consilia isti Chirurghi agere videntur, qui orificia ulcerum cariosorum incidere et dilatare non dubitant. Hoc symptoma certissimum sine dubio et pathognomicum foret, nisi experientia doceret in necrosi etiam si cum maligna suppuratione, aut diutius seclusa indeque corrupto pure et excrescentiis osseis, spinaque sic dicta ventosa conjuncta est, observari. Interea cum sub hac quoque conditione inflammatoria et suppuratoria ossis affectio locum habet, hoc solummodo cum discrimine quod secundario e necrosi et accedente maligna aut male curata partium mollium suppuratione orta sit; affectioque haec summam cum carie similitudinem habeat; symptoma illud jure pro characteristico cariosae ossis affectionis habere posse videtur. Ex iis, quae modo dicta sunt apparet, commodè et aptè distingui posse inter cariè primigeniam, et secundariam; illa ex inflammatione ossis interna et e causis internis originem ducit, haec e causa externa, e necrosi aut suppuratione maligna partium mollium, aut perversa curatione. Inprimis vero causarum quibus ossis

mor-

morbosa affectio orta est cognitio, multum ad certam diagnosin confert, quare jam ad eas progredimur.

A e t i o l o g i a.

Inter primarias et frequentissimas inflammationis ossium et cariei causas scrophulosae organismi affectiones et dispositiones numerandae sunt. Potissimum si intentiori gradu aut sub forma rhachitidis infantile corpus invaserint; aut exteriores quibus prorupuit anomaliae minus aptis remediis externis sanatae fuerant. Huc pertinent etiam dispositio scirrhusa et carcinomatosa, quae non nisi ulterior progressio et inveteratio scrophulosi mali esse videntur. Syphilis quoque interdum cariei causa esse videtur; saepius vero necroseos destructo per suppurationem periosteo. Raro rheumatismus et non nisi secundario et indirecte per diuturnam malignam suppurationem et medelam non idoneam. Idem valet etiam de causis mechanicis, quae per se nunquam cariem efficiunt.

E quibus patet cariem potissimum tum suspicandam esse, cum scrophulae aut dispositio scrophulosa adfuit. Suppressiones excretionum praeternaturalium et metastases, nec non scorbuticae affectiones interdum quidem sed rarissime inter causas cariei locum tenent.

P r o g n o s i s.

Pendet prognosis potissimum a causis corporis constitutione, et valetudine, aetate rebusque externis aut infestis aut propitiis quibus imprimis auxilium medicum aptum aut ineptum adnumerandum est. Omnium pessimam prognosin facit habitus universalis scrophulosus in altiori gradu, et carcinomatofus, praesertim si cum aetate provectora et rebus externis infestis conjunctus est. Tum morbi vis fere semper artis auxilio major est, febreque hectica organismum consumit, nisi forsitan interdum cum jactura membri affecti, artis manu mutilatus organismus, salutem sibi acquirere potest.

M e d e l a.

Medela naturae. Via et ratio qua natura cariem sanare solet, haec est. Orificio ulceris arctando quantum fieri potest et vallo carneo insuper muniendo partes carie affectas sedulo ab aëris noxio contactu secludens, aut resorptione sola, et generandis novis granulationibus, aut exfoliatione partis cariosae simul, quae vel cum pure modo insensibili, aut in forma pulveris vel per lamellas, vel parte universa affecta semel separanda et expellenda fieri solet. Temporis spatium quod in hoc sanandi opere natura consumit, pro ambitu partis adfectae, organismi valetudine et viribus, nec non impedimen-

tis externis, quibuscum ei conflictandum est, quam maxime differt. Quo fit ut interdum aliquot hebdomades sufficiant, interdum menses et anni requirantur. Puris quantitas quae ex ejusmodi ulceribus profluit, multo major est, quam ulcerum cum necrosi. Verum non ea de causa, quia ex osse tanta quantitas excernitur, quod non nisi raro fieri solet, sed quia partes molles pure irritante ex parte cariola, ad profusio-rem puris excretionem excitantur et impelluntur.

Medela artis minus idonea.

Perversa medendi methodus ea est, quae neglectis, aut parvi habitis causis internis, salutem in remediis topicis ossis parti cariosae impositis, injectionibus varii generis vehementer incitantibus, ex infusis, decoctis aut mixturis cum tinctura et liquore Myrrhae, extracto Chamomillae, G. Asae foetidae, Acido phosphorico, ol. caryophyllor. aromat. et hujus generis aliis quaerit; quae nihil prius habet, quam parvam a natura provida productam ulceris aperturam magna incisione facta dilatare, eo scilicet consilio ut propius ad sedem mali accedere et remedia commodius applicare possit; quae turundis ac plumaceolis unguentis irritantibus tinctis sat magni voluminis in aperturam satis amplam immixtis liberum aditum ad interiora

rora ulceris cariosi sibi munire debere videtur. Haec et similia qui fecerit, non modo operam et oleum perdet sed etiam, quo diligentior in exercenda hac methodo fuerit; quo saepius quotidie injectiones fecerit, eo magis suppuratione aucta partium aegrotarum corporisque vires exhauriet; efficietque ut neque resorptio partium corruptarum neque novae granulationes generari neque demum damnum partium laesarum refarciri queat.

Sunt qui ferrum candens in cariei, potissimum maligna adhibeant, inter quos ipse Cel. *Boyer* est, recentissimus de ossium morbis auctor, qui plurima praeclara plurimis Chirurgis adhuc incognita de hoc argumento differit. Verum liceat a viro docto hac in re dissentire naturaeque effata auctoritati artis praeponere. Etenim caries est aut primigenia e causis internis universalibus orta, aut secundaria, necrosi et maligna suppuratione orta. In priori ferrum candens nihil efficere posse ex eo patet, quod remedium locale quantitativum causas universales qualitativas, v. c. syphilitidem, scrophulas, dispositionem scirrhosam etc. tollere neutiquam potest. In posteriori vero, cujus causa localis, nimirum in perversa suppuratione, ichoreque erodente posita est, parum aut nihil prodesse posse, inde cognoscitur, quod destructa ipsa parte cariiosa, non tollitur causa novae oriundae ca-

riei, quippe suppuratio maligna in partibus molli-
libus vicinis, quae si perdurat, et ob formam
ossis, excrescentias, fistulosasque infiltraciones etc.
diutius in ulcere retinetur, ita corrumpitur ut
statim ossis partes circumjacentes in ambitu par-
tis per ferrum candens vita privatae, in necro-
sin et cariem rursus abeant.

Quod vel e carie dentium intelligi potest,
quae, cum ferro candente in necrosin mutata
fuit, per breve modo tempus in hoc statu ma-
net, et mox per contactum aëris et per incita-
tionem ciborum in cariem rursus mutatur, nisi
causae internae tollantur. Jam cum post adhi-
bitionem ferri candentis pars emortua non nisi
per resorptionem, novam granulationem et ex-
foliationem eliminari, id vero sola naturae ope-
ra et non nisi tum fieri potest, cum puris ma-
ligni retentio vitetur, hoc vero idonea deliga-
tione et injectionibus aquae tepidae fieri possit:
apparet applicationem ferri candentis prorsus
supervacaneam esse, et non nisi per ambages
ad finem et copum hoc modo iri. Ne dicam
de noxio contactu aëris, cui hac operatione,
quae magnam ulceris orificii dilatationem et
partium mollium remotionem requirit, liber
aditus aperitur!

Medela artis recta.

Prima indicatio s. medendi regula haec est:

Causam si perdurat, remove; cessante enim causa, saepe numero effectus etiam cessat. Causae vero, quod supra monuimus frequentissimae scrophulae sunt, potissimum in infantibus. Forma sub qua caries puerilem aetatem infestare solet, paedarthrocace est, seu inflammatio condylorum articulationum cum suppuratione et carie. Cui malo facilius obviamitur quam medela adhibetur, quod remediis revulsivis potissimum fieri potest, vesicatoriis, vaporibus aquae ebullientis, fonticulis, ulceribus arte factis, setaceis et cauterio potentiali. Verum haec uberior expositio non huc pertinet.

Aliae causae, syphiliticae v. c. scorbuticae, carcinomatosae et aliae methodo cuilibet conveniente removendae sunt.

Secunda indicatio s. medendi regula est: Puri quam primum fieri potest, liberum exitum per parvam aperturam parare et munire adfectionem usque. Nam si diutius retinetur pus in superficie ossis, eo citius non modo ipsum corrumpit, sed etiam partes molles vicinas corrodit aut inflamat et suppuratione adaucta consumit; praeterea etiam ossis superficiem ita irritat, et ex ea excrecentiae osseae, quae instar spinarum atque cristarum propullulent, et acutis suis apicibus partes molles non minus quam

quam ichor, quo genitae erant, irritent, puris profluvium impediunt et sanationem difficiliorē reddant. Quare maturius incidantur ejusmodi abscessus necesse est, sed ne aër ad interiores partes penetret, parva modo apertura facienda est, curandum quoque ut quotidie pus secretum affluat, ne diutius retentum corrumpatur. Hac de causa interdum injectiones aquae purae tepidae fieri possunt, nequiquam vero ad incitandum aut roborandum. Cavendum quoque est, ne penicillis e linteo carpto factis et in orificium abscessus immixtis apertura ejus obturetur et liber exitus puris impediatur. Nihil igitur in orificium immittendum, sed naturae permittendum est ut quam minimum voluerit efficiat orificium ulceris aut abscessus.

Tertia indicatio est: opus naturae in excernenda parte ossis corruptae adjuva, si necesse est. Necesse autem est artis auxilium tum cum naturae vires ipsius non sufficiunt v. c. cum vires organismi morbo aut infausta conditione externa aut aetate propecta fuerint debilitatae aut exhaustae. Si vero bene valet organismus, nullo auxilio artis opus est, nisi eo, quod in quocunque abscessu requiritur, nimirum diligens ab aëris et frigoris contactu defensio. Magis enim natura bene valente et incitatione non indigente remedia incitantia nocent, quam profunt, nimis enim excitant ideoque exhauriunt vires. —

Quodsi

Quodsi vero natura calcaribus aut adjumento opus habet, neque per injectiones, neque emplastra aut unguenta hoc fieri potest, ac debet; remedia enim optima hoc modo applicata partes molles, praesertim vero systema lymphaticum, quippe quod quam tenerrimum est, et systema plasticum nimis excitant, nimiam suppurationem producunt et per eam vires systematum illorum, quorum ope sanatio fieri debet et unice potest, tantopere debilitant et ita exhauriunt ut paralyfi quasi correpta per annorum seriem inactiosa maneant, et ulcus in pejus magis, quam in melis mutetur,

Tenendum praeterea est, partes molles vicinas, seu ulcus circumdantes organa esse quorum ope et efficacia pars morbose sanari possit ac debeat, ideoque remedia iis esse aptanda, et applicanda; cavendumque ne nimis irritent et suppurationem nimis augeant. Sunt vero remedia, quae experientia teste ulceribus cariosis optime conducunt haec:

Primum *calor* locum tenet. Calor enim vitae fons et conditio, si parti affectae affunditur, sanguinem ad eam allicit, circulationem ejus ibi alacriorem et celeriore reddidit, systematis lymphatici vigorem et functionem erigit et adjuvat; systema potissimum plasticum, cujus ope omnis sanatio peragitur, alacrius et potentius

tius reddit, omninoque vitam localem auget. Inprimis vero calor quam maxime in affectionibus systematis ossium conducit, quippe cui nativa tarditas functionum et permutationis materiae competit. Adhibetur vero calor commode per epithemata sicca calefacta v. e. linteis aut sacculis farina aut furfure repletis; etenim non nativum solum partium calorem velamentis continere sufficit, sed praeterea calor artefactus per epithemata calefacta adhibendus, nativusque artificiale augendus est. Potissimum vero in partibus a corde remotis, inferioribus inprimis extremitatibus, quae variis de causis minori caloris gradu gaudent, et igitur functionum tarditate; ulcerumque majori segnitie et contumacia.

Praeter calorem, qui saepe solus sufficit, *epithemata aromatica* ex herbis aromaticis variis confecta multum ad maturandam cariei sanationem facere experientia docet. Dum enim blando modo cutis organon ejusque functiones excitant et adjuvant, eam neque a salutaris aëris efficacia prorsus secludunt, neque corrumpunt uti emplastra. Adplicentur autem, necesse est ita, ut ab initio minus efficaces adhibeantur herbae aromaticae sensimque vero efficaciores succedant, ut naturae legis ratio habeatur, quae consuetudine ad incitamenta obtusa in dies majora postulat.

Cum his simul conjungendae sunt *lavationes et frictiones* cum liquoribus *spirituosis aromaticis et balsamicis*, qui ita adhibendae sunt, ut partes cutis ulceris vicinae; neutiquam vero partes laesae et suppurantes ipsae cum liquoribus spirituosus laventur.

Praeterea eadem ratione adhibendi sunt spiritus, qua epithemata aromatica, progrediendo nimirum et augendo efficaciam. Primum spiritus aromatici simplices, deinde fortiores et compositi, v. c. cum oleis variis aromaticis, Anthos, Saffafras, Lavendulae, Thymi, Caryophyllor. aromatic., cum balsamo Hoffmanni, peruviano; potissimum vero cum Liquore Ammonio caustico, quem nunquam negligendum, neque in ulla mixtione omittendum suaserim, cum quam efficacissime vires organismi instauret atque roboret,

Neque *balnea* universalia et topica negligenda sunt; nihil enim magis functionem cutis auget ulcerumque sanationem adjuvat quam calor blandus — nocent enim nimis calida — si per horam aut saltem dimidiae horae partem continuo in organismum agit. Hisce balneis aqua pura factis, admisceri possunt deinde, successu temporis, si rei ratio exigit, aromata et balsama varii generis. Haec fere sunt blanda quidem, verum non minus efficacia remedia qui-

quibus affectiones cariosae faustissimo cum successu in schola clinica sanari vidi; ita ut hisce rite adhibitis aliis remediis, quae vulgo pro specificis habentur, v. c. Extracto Chamomillae, G. Alae — foetidae, Acido phosphorico, Liq. Myrrhae aliisque rarissime adhibendi locus et occasio fuerit, ne dicam necessitas.

Caeterum caries primigenia nisi raro et fere nunquam nisi a causa scrophulosa orta observata est, in omnibus illis casibus, in quibus vulgo cariem vident Chirurghi non nisi ossis nudationem aut necrosin et hanc quidem saepissime illam raro cognovimus; v. c. in panaritiis, in fistula lacrymali, in parotidibus spuris male curatis, in fistulis dentium, in ozoena syphilitica, in abscessibus syphiliticis capitis, in psoide et in aliis.

DE NECROSI OSSIUM.

De notione et natura necroseos ossium.

Quid sit necrosis ossium vox ipsa indicat, nimirum mortem partis ossis affectae, quae gangraenae et sphacelo partium mollium respondet. Utriusque enim natura indolis humidi et ficci necrosis esse videtur, licet hac de re nondum certe constet, cum inter cariem malignam et necrosin humidam tanta similitudo intercedat ut ob symptomatum inter se affinitatem inprimis

nis si partes affectae ab oculorum aspectu seclusae latent, vix ac ne vix quidem a se invicem distinguere queant. Quare non nisi de necrosi sicca nobis hic sermo erit, humidamque cariei adnumeramus malignae, quippe cum qua et diagnosin et medelam communem habet.

Corripit vero necrosis plerumque non nisi superficiem externam ossis, sive laminam anteriorem, modo majori modo minori ambitu; simulque interdum modo magis, modo minus subjacentis substantiam ossis solidam aut spongiosam. Interdum vero dimidiam aut majorem ossis cujusdam partem, apophyses aut diaphysin, aut universum os destruit, ita ut prorsus emoriatur et novum ejus loco generetur, quo vetus circumdatur et ita includitur, ut aperturae maneant, per quae pus, in partibus mollioribus genitum, intrat et in forma ichoris rursus effluit. Ejusmodi ossa emortua, nomine sequestrium nota, tamquam corpora aliena diuturnae et nunquam nisi removeantur cessantis suppurationis causae sunt. Ejusmodi necrosis universalis ossis cujusdam saepius secundaria est, nimirum e carie orta. Duplex nimirum necrosis distinguere posse videtur, primaria scilicet primigenia quae nulla alia ossis affectione praegressa, per jacturam periosteii oritur, quae etiam sicca appellari potest; et secundaria ex ulcere seu carie orta, quae ob puris secretionem humida

da nominari possit, quoad nimirum suppurationis adest; Verum revera non ex ossis parte necrotica pus secernitur sed e parte cariola; simulac enim pars morbosa prorsus exfoliata est, ipsa nullam prorsus suppurationem habet, praeter illam quam mechanica irritatione e partibus vicinis mollibus elicit et contactu suo noxio in pejus mutat. Quare aperturae in novo osse, vetus necroticum exfoliatum circumdans et includens, repertae non secundum vulgarem opinionem propterea ortae sunt, quod ichor a sequestre secretum effluere possit — sequester enim pus prorsus non excernit; — sed propterea, quod pus, e partibus mollibus secretum, os mortuum circumfluens et ab eo corruptum, propter continuam secretionem et infiltrationem in cavitationem quae inter vetus et novum os intecedit, ex illa omne prorsus effluere non potest. Jam cum diutius ibi moratur, corrumpitur et sanationem perfectam impedit.

D i a g n o s i s.

Necrosis primigenia facilius a carie quam a simplici ossis nudatione distinguitur, omnia enim symptomata quae ab auctoribus vulgo enumerantur dubia et incerta sunt. Neque enim e periostei defectu necrosis cognosci potest, nam mera nudatio ossis eodem symptomate gaudet; neque ex ossis asperitate, haec enim
in

in utraque ossis affectione adesse et abesse potest; neque e puris indole, nam os necroticum nec pus nec saniem secernit; neque e specilli argentei mutato colore; nequaquam enim eum mutat, nisi ichor e partibus mollibus in ulcere lateat; neque demum e colore ossis fusco aut nigro, nam hunc colorem non nisi ab aëris contactu et remediorum applicatione accipit.

Verum enim vero unum symptoma nullum, quare conjuncta forsitan certam cariei diagnosi constituant? Nequaquam; nam si vel omnia simul adsint, attamen ex iis certo definiri non poterit utrum caries adsit an necrosis. Quare alia via ad certam diagnosi progrediamur necesse est.

Verum ut rite procedamus et eo certius finem nostrum assequamur, distinguamus inter necrosin primigeniam et secundariam seu eam quae e carie oritur. Primigeniae necroseos signa diagnostica haec sunt.

Ossis pars a periosteo nudata est nulla antegressa ejus inflammatione, sed aut causis externis mechanicis vel dynamicis; aut internis quantitativis vel qualitativis periosteum inflammatum et suppuratione destructum, aut absque illa, vi quadam demtum est, v. c. vulnere, fractura etc. Extra igitur, non in osse causa nudationis ossis fuerit necesse est. Hoc primum
est

est, ad quod Chirurgus in examine attentus sit. Nunquam enim ossis inflammatio cum suis symptomatibus praegressa est, ubi necrosis primigenia adest; nam si praegressa est, caries adfit necesse est, aut necrosis secundaria. Verum enimvero cum simplex ossis nudatio eodem signo indicari, iisdemque a causis originem ducere possit, alterum in quod inquirat, est.

Tempus per quod nudatio ossis duravit quod si aliquot dies, septem aut novem exceaserit, non simplicem nudationem sed necrosin adesse magna cum verisimilitudine suspicari licet. Quod si vero per hebdomades aut menses ne dicam annos duraverit, semper necrosin adesse certissime sibi persuasum habere potest. Nudatio enim, quod supra monitum est, non nisi per aliquot dies integra manet, quibus exactis in necrosin abit.

Tenendum praeterea est, virisimilem semper magis praesentiam necroseos esse, cum causae qualitative v. c. syphilis, herpes, scabies etc. et pus malignum, quam si causae quantitativae vel mechanicae et suppuratio bona adfuerit. Hisce duobus signis jam acquiescere potest Chirurgus, si alia defecerint, verum sunt adhuc plura ad quae animum advertat necesse est.

Huc pertinet: Ossis pars denudata peritoeo, aëris contactui per aliquot tempus v. c.
per

per horas aut dies aliquot exposita fuerat. Experientia enim docuit atmosphaerae tactum ossi periosteo nudo quam maxime noxium esse et semper necrosin efficere. Dignoscitur simul hoc symptomate necrosis a simplici nudatione ossis, quae uti diximus non nisi tum adhuc locum habere potest, cum aut prorsus non aut per brevissimum tempus os aëri fuerit exposita. Idem valet de

Medicaminum irritantium ad partem ossis periosteo orbam adplicatione; ea enim eundem effectum, quem atmosphaera in os habet, mortem nimirum partis cui applicantur, et eo citius quo magis et fortius remedia os affecerunt. Hisce symptomatibus et conjunctis et singulis certissimis aliud praeterea jure adnumerandum est; nimirum.

Fossula seu depressio, in circuitu partis nudatae ossis, in confiniis ossis et circumdantis periostei integri. Hanc scilicet si cum specillo exploratorio animadvertere licet, certiores esse possumus, non modo necrosin revera adesse, sed exfoliationem jam inchoatam esse licet neque aëri, neque medicaminibus pars nudata exposita fuerit, neque nisi per breve tempus duraverit, quid? quod abscessus sub quo latebat, non nisi tum demum, cum exploraretur, vel artis auxilio vel naturae viribus apertus fuerit. Experientia enim quotidiana docet, in
ab-

abscessu perioſteo inſidente, nondum aperto deſtructo hoc per ſuppurationem perioſteo interdum non modo necroſin in parte nudata aſſeſſe ſed etiam reſorptionem jam coepiſſe a natura inchoari.

Symptomata in antecedentibus expoſita, rite obſervata diagnoſin necroſeos primigeniae certiffimam reddunt ejusque cum nudatione et carie confuſionem non admittunt, quod vero ad necroſin e carie ortam attinet ex aliis praeterea ſignis et haud raro difficulter cognoscitur. Nimirum primum caries aut adfuit aut adhuc adest, nec per breve modo temporis ſpatium ſed ſatis diu;

Non parva, modo ſed major, aliquot ſaltem lienas lata pars carie corrupta eſt. Minor, enim v. c. lineae aut duarum linearum particula cariola ſaepeius reſorptione quam exfoliatione a natura ſanatur. Majores partes non item.

Pars iſta licca prorſus eſt, neque ullum ſuppurationis veſtigium oſtendit, licet in contiguſ ſollis et cutis aut muſculorum partibus ſuppuratio continuetur. Difficulter vero hoc ſignum in ulceribus profundis cognosci poteſt.

Si reſorptio inchoata aut jam progreſſa eſt, foſſula illa ſupra commemorata, apparet et pars quae exfoliatur mobilis fieri incipit; abſoluta
vero

vero exfoliatione sensim sensimque ex imo ulcere tollitur ope granulationum sub ea propululantium. Quod valet etiam de partibus primigenia necrosi affectis, neque ambigua tum aut difficilis est diagnosi.

Quodsi demum novo osse vetus circumdari coepit ex intumescencia ossis et interdum membri ipsius hoc facili negotio cognoscitur. Caeterum interdum ob symptomatum incertitudinem et ambiguitatem certa hujus necroseos diagnosi prorsus non fieri poterit, praesertim tum, cum caries in necrosin transire coepit. Verum parum interest curae therapeuticae utramque affectionem accuratius distinxisse, cum utriusque medela fere eadem sit.

A e t i o l o g i a.

Causae necrosis primigeniae occasionales aut in organismo aut extra eum sunt. Ad priores referenda sunt omnia illa momenta quae inflammationem et suppurationem periostei efficiunt v. c. contagia quaedam, cachexiae, syphilis, arthritis, scorbutus; suppressio excretionum naturalium et praeternaturalium, rheumatismus, pfora, herpes suppressus, etc. Interdum etiam metastasis.

Ad posteriores pertinent omnes laesiones externae quibus periosteum destruitur et pars
C
ossis

ossis nudata aëri diutius exponitur, v. c. fracturae, vulnera, operationes, contritiones. Accedat nimirum aëris contactus aut alia res noxia necesse est, nam laesiones periostei per se non necrosin sed meram nudationem, ut supra dictum est, efficere solent. Aëris ergo contactus alia causa est, si vel per breve tempus continuavit. De tempore quidem experimentis deficientibus nondum satis constat, brevissime tamen, ne horae quidem sufficere observatum est. Potissimum vero saepenumero accusanda est perversa medela, quae magnis incisionibus et vulnorum dilatationibus factis, non modo aëri liberum aditum aperit, sed etiam injectionibus irritantibus simplicem nudationem in necrosin permutat; nam experientia docuit, omnia quae vel leniter os periosteo orbatum, irritent mortem *s.* necrosin ei conciliare. Huc pertinet quoque pus diutius in superficie ossis nudati retentum et corruptum; quare mature, uti diximus aperiuntur ejusmodi abscessus, necesse est.

Necrosis secundaria originem trahit partim ex iisdem causis partim et imprimis e defectu nutritionis ob diuturnam suppurationem, partim ex iis causis, e quibus caries ipsa orta erat.

Causa proxima omnis necroseos est defectus nutritionis quacunque de causa, potissimum ob jacturam periostei. Interdum in ossis ipsius

ipſius indole corrupta eſſe videtur, nimirum cum totum a natura excernitur et expellitur.

P r o g n o ſ i s.

Prognofis necroſis primigeniae fauſta eſt, ſi organiſmus caeterum bene valet, et cauſa removeri poteſt, aut jam remota eſt, v. c. ſi ſyphilis univerſalis curata eſt, aut ſanari poteſt, quod, quantum nos experientia docuit, ſemper fieri poteſt. Mala vero ſi contrarium locum habet. Potiſſimum vero prognofis a ratione medelae pendet, quae ſi perverſa fuerit, per annos aut in perpetuum duratura eſt necroſis, verum ſi idonea et naturae conſentanea eſt, ter novem diebus prorſus ſanari poterit.

Pejor ſemper prognofis in necroſi ſecundaria eſſe ſolet, ob cauſarum quibus caries orta eſt malignitatem, v. c. ſcrofuloſas affectiones, quae non niſi difficillime curantur. Fauſtior tamen eſt in organiſmo puerili et juvenili et propitia conditione externa utente, per breve tempus durante, in organis et partibus corporis ab articulationibus remotis. Omnium infauſtiſſima caeteris paribus eſt in corpore ſenili, diſpoſitione cachectica aut carcinomatofa, in articulationibus et tum, cum ob diuturnam pravam ſuppurationem majores oſſium partes ita deſtructae ſunt, ut excrescentiae oſſeae criſtarum et

verrucarum instar ortae sunt aut spina ventosa simul adest.

MEDELA.

Medela naturae.

Solet autem natura triplici ratione ossis necrosin sanare, aut resorbendo totam partem emortuam, quod fieri solet tum cum parvula modo particula superficiei corrupta est; aut resorbendo et exfoliando, quod in majoribus amplioribus et crassioribus etiam partibus fit; aut demum intercipiendo et occludendo omnem omnino nutritionem et materiae circulationem per periosteum ita ut in toto ejus circuitu omnis nutritio cesset et novi ossis prima stamina circumquaque in interiore periosteae superficiei ponantur. Hoc in necrosi totius cujusdam ossis fieri solet,

In exfoliatione particulari vero natura hoc modo progreditur. In circuitu emortui et sani ope vasorum lymphaticorum materia ossea ita resorbetur ut fossula parva lineae circiter lata et ad sanam usque substantiam profunda oriatur. Hanc fossulam, quae in superficiei non amplius dilatatur sed cuniculos quasi agens ossis partem necroticam circumquaque suffodit, (unterminiret) a peripheria seu ambitu incipiens et ad centrum s. mediam partem ejus progredientem; hanc inquam fossulam presse sequitur nova granulatio,

s.

f. propullulatio granulationum carnis ope systematis plastici periostei. Ita sensim sensimque resorptio circumcirca cum nova granulatione pari passu progrediens, cum ad centrum perventum fuerit ossis, particula emortua prorsus a sanis partibus subjacentibus soluta, tollitur, sensimque propullulantibus indies magis granulationibus evehitur, et dum mechanica irritatione in partibus mollibus superjacentibus musculis et cute suppurationem et consumptionem earum auget ad superficiem demum effertur et prorsus expellitur, ita ut interdum in plumaceolis impositis haereat, et cum iis auferatur.

Medela artis minus idonea.

Medela minus idonea ea fere est, quae in capite de carie reprehensa est, nimirum quae dilatato orificio ulceris remedia irritantia ad superficiem ossis emortui adplicat, et injectionibus incitantibus partes molles debilitat. Huc referenda est methodus a nonnullis commendata, partem necroticam puncturis aut foraminibus parvulis perforandi aut scalpris aliisque instrumentis ferreis auferendi. Nihil enim iste curandi modus nonmodo juvat, sed etiam nocet. Per foramina enim aer profundius intrat et necrosin ad interiores ossis partes propagat; demta vero per scalprum superficiei necrotica profundiores sanae partes hac methodo contactui

ctui aëris expositae, etiam emoriuntur, necrosisque ad interiores partes progreditur.

Neque ferrum candens proficit, quid enim mors ad mortem fugandam? Nonne ferrum candens necrosin efficit? Necrosis vero jam adest, quomodo ergo eam sanare aut exfoliationem ossis adjuvare potest?

Idem valet de liquoribus istis ad exfoliandum commendatis v. c. Liquore Bellostii, Liquore Myrrhae etc. nihil non modo proficiunt, sed nimiam suppurationem in partibus molli-
bus excitando nocent. Quare omnia illa immediate ad os adplicata mittenda et simili ratione qua cariem sanare docuimus; necrosis quoque sananda est.

Medela artis idonea.

Duplex potissimum indicatio seu medendi regula in curatione necroseos observanda est:
Nimirum

Natura in opere exfoliationis adjuvanda est ab arte, si ipsius vires non sufficiunt. Nam si organismus bene valet, causaque localis modo necrosin effecit, natura ipsa, modo ne turbetur, brevi tempore, uti in antecedentibus exposuimus, resorptionem et exfoliationem absol-
vit, v. c. in panaritio, post trepanationes, am-
pu-

putationes, in contritionibus ossium etc. Verum si e causis internis orta est necrosis, ante omnia illae, diligenter investigatae et certe cognitae, artis auxilio removendae sunt v. c. syphilis, arthritis etc. Quomodo hoc fieri possit nec consilii praesentis nec ambitus libelli est exponere, nota haec supponuntur.

Si vero in universum organismus nimis debilitate laborat, aut minus propitiis rebus externis utitur; artis est illam methodo nutriente, roborante, excitante et animante remove; et conditionem externam quantum fieri potest meliorem reddere.

Caeterum externe partem affectam eadem ratione, qua in carie utitur, et quam in capite de carie exposuimus, curet atque deliget necesse est, cum idem consilium eadem naturae efficacia eodemque opificio assequi velit, nimirum resorptionem et exfoliationem partis mortuae; eorundem ergo systematum ope, lymphatici ad resorbendum et plastici ad generandas novas granulationes opus habet, quibus ad cariem sanandam indiget. Sedulo ergo in hujus quoque morbi cura, omnia vitanda sunt, quae partes molles contiguas, periosteum potissimum nimis irritare, suppurationem nimiam et paralyticam quasi debilitatem earum efficere possint.

Altera artis regula haec est. Removenda est pars exfoliata artis auxilio, si sola naturae ope expelli non potest. Solent quidem uti jam diximus, naturae vires plerumque ad hoc negotium sufficere, sed interdum particula exfoliata, ob formam irregularem in partibus ossis ejusdem contiguis, aut in aliis adjacentibus aut sub ligamentis, aponeurosis, ossibus aut aliis organis haeret; aut si universum quoddam os exfoliatum est, novo circumdatur, ita ut diuturnas fistulas et suppurationem perpetuam efficiat. Hic artis auxilio opus est. Caute incidantur partes molles, ita ut organorum vicinorum laesio quantum fieri potest, vitetur, incidatur quoque os recens formatum, et si jam induruerit, trepani ope, et pars emortua sequesterterque extrahatur. Interdum nimis ampla particula ossis necrotici exfoliata, antequam extrahatur, comminuenda est, ne partes contiguas laedat, aut quoniam alia ratione extrahi prorsus non potest. Remota parte mortua, sanatio ulceris brevissimo tempore naturae opera perficitur.

Restat ut ea quae in antecedentibus strictim exposuimus exemplis, quibusdam affectionum illustremus et confirmemus; e pluribus igitur casibus sequentes brevi narratione adjiciamus.

Observatio prima.

R. Sartor hujus urbis, incola qui per aliquot tempus ozoëna laboraveret, inflammatione secundaria sacci lacrymalis corripiebatur; quam cum negligeret in suppurationem et fistulam lacrymalem abiisse reperiēbamus cum se curae instituti clinici sisteret. Exploratione fistulae sacci lacrymalis facta, os a periosteo nudatum, apertum et a pluribus cariem adesse judicatum est. Neque profecto a verò opinio haecce aberrare videbatur, cum non modo ex ozoëna syphilitica illa inflammatio et fistula lacrymalis orta erat, sed auctores etiam qui de fistula lacrymali scripserunt, affirmant, cariem saepenumero ex illa affectione oriri. Verum differebat praeceptoris sententia, quippe qui affectionem ossis pro mera nudatione ossis habebat, hisce permotus causis. Inflammatio sacci lacrymalis non nisi secundaria per consensum ozoënae orta erat, nec nisi per aliquot dies duraverat; os erigi non expositum neque medicaminibus irritantibus contactum fuerat.

Et confirmavit hanc sententiam experientia. Nam licet nihil omnino nisi deligatio sicca adhiberetur, et puri liber exitus servaretur, post aliquot dies pars ossis a periosteo nudata sanata, neque specillo amplius nudatio reperta est. Haec nudatio absque dubio in necrosin mutata est, si — quod saepissime fieri solet — injectio-

Altera artis regula haec est. Remota est pars exfoliata artis auxilio, si sola natura ope expelli non potest. Solent quidem ut diximus, naturae vires plerumque ad hoc negotium sufficere, sed interdum particula exfoliata, ob formam irregularem in partibus ejusdem contiguis, aut in aliis adjacentibus sub ligamentis, aponeurosis, ossibus aut aliis organis haeret; aut si universum quoddam exfoliatum est, novo circumdatur, ita ut non nas fistulas et suppurationem perpetuam. Hic artis auxilio opus est. Cautè inciduntur partes molles, ita ut organorum vicinorum non laedatur, sed solummodo quantum fieri potest, vitetur, in quoque os recens formatum, et si jam inciderit, trepani ope, et pars emortua sequenter extrahatur. Interdum nimis amputata particula ossis necrotici exfoliata, antequam extrahatur, comminuenda est, ne partes corum laedat, aut quoniam alia ratione extrahi non potest. Remota parte mortua, ulceris brevissimo tempore naturae ope sanescit.

Restat ut ea quae in antecedentibus articulis exposuimus exemplis, quibusdam articulis illustremus et confirmemus; e quibus igitur casibus sequentes brevi narratione describamus.

Ob

artor

ozo

fa

gli

e

PAGE 15
GLUED

tiones excitantes factae aut plumaceoli medicaminibus irritantibus tincti immissi fuissent.

Observatio secunda.

Puella viginti annos nata optima caeterum valetudine fruens, e refrigeratione inflammationem in maxilla superiori in regione alae nasae sinistrae, periosteo inhaerentem nacta, acerbis doloribus excruciabatur. Post aliquot dies cum jam, licet obscure modo fluctuatio sentiebatur abscessus in cavitate oris per lanceolam apertus est: immisso calamo exploratorio particula ossis magnitudine fabae a periosteo nudata detecta est. Cum dubitari nequaquam posset, non nisi simplicem ossis nudationem adesse, nihil omnino ne deligatio quidem ulla adhibita est cum aer ob tectum abscessus orificium per labium superius non intrare, pus vero libere effluere posset; ita diebus quinque sanatio peracta est. Ejusmodi casus similes plures observati sunt.

Observatio tertia.

Miles quadraginta annorum hectica constitutione, post inflammationem rheumaticam maxillae inferioris et inde orta suppuratione male curata, necrosi magnae partis sinistrae maxillae laborabat et per annum et quod excurrit, emplastris, unguentis et injectionibus bis quotidie

die factis usus erat. Verum tantum aberat
t necrosis ad sanationem progressus faceret,
t magis magisque retrogredi et ad febrem hec-
cam ob virium per suppurationem exhaustio-
em vergere videretur. Aegrotus hicce licet,
t dictum est, nequaquam fausta constitutione
tebatur, adhibitis remediis internis nutrienti-
us et roborantibus notis et calore, aromaticis-
ue epithematibus ficcis et frictionibus externe
uobus mensibus ad sanationem perductus est.
Exfoliatione enim magna maxillae pars qua-
uor pollicum longa solvebatur, et apertura
acta artis auxilio extrahebatur. Idem fere ac-
cidit in femina quadam.

Observatio quarta.

Mulier quinquaginta annos fere nata carie
condyli radii in articulatione ossis humeri per
aliquot annos e causa syphilitica laborans, va-
riis que remediis sine ullo successu curata, in-
stituto clinico sese tradebat. Pars cariola in
condylo non parum inflammato et inde tumi-
do, non modo dolores magnos aegrotae exci-
tabat verum etiam ichorem male olentem fun-
debat, et excrescentiis variis fungosis obducta
erat. Omnibus remediis externis hucusque ab
aliis adhibitis rejectis, externe nihil nisi calor
ficcus et aromatica sicca et spirituosae adhibe-
bantur, neutiquam in superficie ulceris ipsius,
sed

sed in ambitu, nimirum in cute. Interne vero hydrargyrum muriaticum corrosivum secundum novam methodum adhibebatur. Hisce remediis non modo brevi tempore ichor in bonum pus mutabatur sed etiam excrescentiae fungosae disparebant, et ulcus ossis sine exfoliatione sanabatur.
